

參同契跋

嘗聞先達高象先詩云金碧龍虎參同契留爲萬古丹中王又古今諸仙多尊參同契爲丹法之祖蓋古有金碧龍虎經辭寡意深世人莫曉至漢魏君伯陽演經爲契魏君越之上虞人今越之公庫頌行惟以彭曉箋義而爲善本然世代遷革今所行者已非彭真獨首敘與明鏡圖得魏君之旨至於諸家之註皆以旁門附會故張平叔慨嘆世人將仙經妄行箋註者是也抱一先生陳君自淮游浙學者以是書質其真僞蓋世之好異之士或以參同契爲僞書猶今所行麻衣之易也愚師事抱一先生最久親聞與論謂魏君以伯陽自名實老氏之化身也而參

道藏輯要

參同契跋

七

虛集四

同契辭章近古全述真機實魏君之言非常人所可擬述也猶麻衣之易實陳希夷記錄麻衣之言非世儒可道而或者妄傳以爲已作惑誤後人是猶貪天之功豈不獲罪於天耶愚聞是語心融意釋因請抱一先生爲之註然而先生無心事事不可以筆硯浼愚時以一二段求釋其旨歲月旣久方成全編敬命梓工以傳同志噫金碧經待參同而始顯參同得先生解而始明是猶春秋之有左傳又得杜預爲之釋也上天憐憫學道者流生先生於斯世發明丹經之秘奧學者秘而傳諸母貽輕泄漏慢之譴不勝至禱時端平改元正旦希微子王夷焚香再拜誓心敬跋